

Paano Nabubuo ang Isang Batas?

May pinagdadaanang proseso ang isang panukalang-batas bago ito tuluyang maging batas para maipatupad sa ating bansa. Ang bawat panukalang-batas na pinagtibay ng Kongreso ay dapat sumaklaw ng isang paksa lamang na dapat nakalahad sa pamagat nito.

Ang isang panukalang-batas ng anumang kapulungan ay pinagtibay sa tatlong pagbasa sa magkakahiwalay na araw. Tatlong araw bago mapagtibay ito ay ipinag-uutos ang pamamahagi ng nakalimbag na kopya nito sa mga kagawad ng kapulungan.

Ang bawat panukalang-batas na mapagtibay ng Kongreso ay ihaharap sa pangulo bago maging batas. Lalagdaan ito ng pangulo kung sinasang-ayunan niya ito. Kung hindi naman, ipairal niya ang kapangyarihang betohan ito at ibalik sa Kongreso. Kinikilala ito bilang veto power. Kalakip nito ang kanyang mga tutol laban sa panukalang-batas upang muling talakayin ang mga ito.

Bilang ng mga Salita: 130

(Inocencio, et. Al, Pilipinas: Ugat ng Lahing Pilipino 6 (2006), Wizard Publishing House, Inc. Tarlac, Tarlac)

Mga Tanong:

1. Alin sa sumusunod ang nagsasabi tungkol sa isang panukalang batas? (Literal)

- Nilalagdaan ito ng pangulo bago ito pinagtibay.
- Kasama ang pangulo sa pagtitibay nito sa Kongreso.
- Maaaring tutulan ito ng pangulo bago maging batas.
- Hinaharap ito sa pangulo bago pinagtibay ng Kongreso.

2. Alin sa sumusunod ang unang nagaganap sa pagbuo ng isang batas? (Literal)

- Hinaharap ang panukala sa pangulo upang lagdaan.
- Ipinapamahagi ang kopya ng panukala sa mga kagawad.
- Pinagtibay ang panukala sa tatlong pagbasa sa Kongreso.
- Ibinabalik ito ng pangulo sa Kongreso kung may mga tutol dito.

3. Kailan ginagamit ng pangulo ang kanyang kapangyarihang betohan ang isang panukalang-batas? (Paghinuha)

Ginagamit ng pangulo ang veto power kapag _____.

- sang-ayon siya sa panukalang batas
- hindi sang-ayon ang Kongreso sa panukalang batas
- may mga dahilan siyang tutulan ang panukalang batas
- hindi ipinagtibay ng tatlong beses ang panukalang batas

4. Ano ang salitang maaaring kasingkahulugan ng sumaklaw sa ikalawang pangungusap ng seleksyon? (Paghinuha)

- bumanggit
- magsama
- mag-usisa
- tumalakay

5. Ano kaya ang dahilan kung bakit kinailangang makapagpatibay ng mga bagong panukalang-batas? (Paghinuha)

- Isinasailang-alang nito ang ikabubuti ng Kongreso.
- Kailangan ng batas para sa ikabubuti ng mga mamamayan.
- Pinagtibay ang batas para sundin ang panukala ng pangulo.
- Trabaho ng Kongreso na makabuo at makapaglimbag na batas.

6. Ano kaya ang mangyayari kapag hindi napagpatibay ang isang batas sa Kongreso? (Paghinuha)

- Ito ay hindi maaaring maipatupad.
- Madadagdagan ang batas na susundin.
- Ipaalam na ito sa lahat para ipatupad.
- Hindi ito lalagdaan ng pangulo bilang pagtutol.

7. Alin sa sumusunod ang nagsasabi ng pangunahing ideya ng seleksyon? (Paghinuha)

- Sa Kongreso nabubuo ang isang batas.
- Maraming paraan para makabuo ng batas sa Kongreso.
- May paraang pinagdaraan ang pagbuo ng bagong batas.
- Ang isang panukalang batas ay dapat sumaklaw sa isang paksa.

8. Saang bahagi ng seleksyon matatagpuan ang pangunahing ideya nito? (Pagsusuri)

Makikita ito sa _____ ng seleksyon.

- gitna
- katapusan
- simula
- simula at katapusan

9. Ano ang layunin ng sumulat ng seleksyon? (Pagsusuri)

- Hatid nito ang isang balita.
- Hangad nitong manghikayat.
- Nais nitong magbigay ng kaalaman.
- Gusto nitong magbigay ng mungkahi.

10. Ano ang ginamit ng may-akda ng seleksyon upang ipaabot ang mensahe nito? (Pagsusuri)

- Binanggit ang kasaysayan ng pagbuo ng batas.
- Nakasaad ang mga dahilan ng pagbuo ng batas.
- Inilarawan ang sanhi bunga ng pagbuo ng batas.
- Tinalakay ang pinagdaraan sa pagbuo ng batas.